

Թեամբ և նոյն կարգով նոյն տէր Յովհաննէսի հըսկողութեան տակ կաշու մէջ կարեցին և սայլերի վերայ բարձած Ասպահան հասուցին Ս. Էջմիածնի տաճարից հանած տասն և հինգ քար, որոնք նոյն պատուով ընդունուեցան և իրրև սրբութիւններ դրուեցան նոր Զուղայի Խօջենց անունով եկեղեցու մէջ:

Քարերն և Ս. Աջը տանելու խորհուրդն այն էր, որ նոր Զուղայում նոր Էջմիածին շինուի, և այդ իսկապէս այն պատճառով, որ նոր Զուղայի Հայերն աւելի իրենց հայրենական վանքերի, ուխտատեղիների, մանաւանդ Ս. Էջմիածնի, կարօտն էին քաշում: Նոքա մտաբերում էին շարունակ, որ Էջմիածնումն է Ս. Լուսաւորչի Աջը, որով օրհնւում է Ս. Միւռոնն և տարածւում ամբողջ ազգի մէջ: Շահաբաս զաղթականների խօսքերից հասկացաւ, որ Ս. Աջի և Ս. Միւռոնի պատճառով բոլոր Հայոց ազգն հնազանդում է Ս. Էջմիածնի Աթոռին և նորա կաթողիկոսին, ուստի նա կամենում էր Ս. Էջմիածինը փոխադրել նոր Զուղայ, որպէսզի այնտեղ կաթողիկոս նստի, միւռոն օրհնէ և Հայոց ազգը հաստատուի մնայ այնտեղ, չորովհետև Աջի և Էջմիածնի վերայ է կապուած բոլոր Հայոց ազգը: * Այս հեռատես խորհրդին յարմարուե-

* Առ. Դաւ. ԺԷ.